

POLITIKA PRIVATNOSTI

Cilj Politike privatnosti Općinskog suda u Zenici (u daljem tekstu: Sud) je da u skladu sa članom 68. Zakona o zaštiti ličnih podataka (u daljem tekstu: Zakon), svim licima čije lične podatke Sud obrađuje u okviru postupaka koje provodi, uz izuzetke propisane posebnim zakonom, pruži informacije o obradi njihovih ličnih podataka na transparentan način.

Politika privatnosti se primjenjuje na sve lične podatke koje Sud prikuplja, upotrebljava ili na drugi način obrađuje, direktno ili putem svojih partnera, trećih osoba.

Lični podatak je svaki podatak koji se odnosi na fizičku osobu čiji je identitet utvrđen ili se može utvrditi.

Obrada ličnih podataka je svaki postupak ili skup postupaka koji se obavlja na ličnim podacima ili na skupovima ličnih podataka, automatiziranim ili neautomatiziranim sredstvima kao što su prikupljanje, evidentiranje, organizacija, strukturiranje, čuvanje, prilagođavanje ili izmjena, pronalaženje, ostvarivanje uvida, upotreba, otkrivanje prijenosom, širenjem ili stavljanjem na raspolaganje na drugi način, usklađivanje ili kombiniranje, ograničenje, brisanje ili uništavanje.

Kontrolor podataka je fizičko ili pravno lice, javni organ ili nadležni organ koji samostalno ili sa drugim određuje svrhe i sredstva obrade ličnih podataka.

Nadležni organ je organ koji je nadležan za sprječavanje, istragu i otkrivanje krivičnih djela, gonjenje učinilaca krivičnih djela ili izvršenje krivičnih sankcija, uključujući i zaštitu i sprječavanje prijetnji javnoj sigurnosti, kao i pravna lica ako su zakonom ovlaštena za obavljanje ovih poslova kao posebna kategorija.

1. Podaci o kontroloru podataka

Općinski sud u Zenici, Trg BiH 2, 72000 Zenica

Tel: +387 32 465-700

Faks: +387 32 430-222

Službenik za zaštitu ličnih podataka

Tel: +387 32 465-700 lok. 756

E-mail: opsud-zenica@pravosudje.ba

2. Svrha i pravni osnov za obradu ličnih, podataka

a) Stvarna nadležnost

Općinski sud u Zenici prema članu 27. Zakona o sudovima u Federaciji BiH (Sl. novine FBiH broj: 38/05 i 22/06) stvarno je nadležan:

U krivičnim predmetima da u prvom stepenu sudi:

- za krivična djela za koja je zakonom propisana kao glavna kazna novčana kazna ili kazna zatvora do 10 godina, ako posebnim zakonom nije određena nadležnost drugog suda;
- za krivična djela za koja je posebnim zakonom određena nadležnost općinskog suda;
- za krivična djela za koja je Sud Bosne i Hercegovine prenio nadležnost na općinski sud;
- u svim krivičnim postupcima protiv maloljetnika;
- da postupa tokom istrage i nakon podizanja optužnice u skladu sa zakonom;
- da odlučuje o vanrednim pravnim lijekovima kad je to zakonom predviđeno;
- da odlučuje o brisanju osude i prestanku mjera sigurnosti i pravnih posljedica osude, na osnovu sudske odluke i
- da postupa po molbama za pomilovanje u skladu sa zakonom.

U građanskim predmetima da u prvom stepenu sudi:

- u svim građanskim sporovima
- u vanparničnom postupku

U privrednim predmetima općinski sudovi koji imaju privredna odjeljenja u prvom stepenu sude:

- u sporovima koji se odnose na prava i obaveze po osnovu pravnog prometa roba, usluga, vrijednosnih papira, vlasničkih i drugih stvarnih prava na nekretninama, te na prava i obaveze proistekle iz vrijednosnih papira u kojima su obje stranke u postupku pravno lice ili fizičko lice koje, u svojstvu samostalnog poduzetnika ili u drugom svojstvu, obavlja privrednu ili drugu registriranu djelatnost u vidu osnovnog ili dopunskog zanimanja;
- u sporovima koji se odnose na brodove i na plovidbu na moru i unutrašnjim vodama, te u sporovima na koje se primjenjuje plovidbeno pravo, osim sporova o prijevozu putnika;
- u sporovima koji se odnose na avione, te u sporovima na koje se primjenjuje vazduhoplovno pravo, osim sporova o prijevozu putnika;
- sporove iz autorskog prava, srodnih prava i prava industrijske svojine;
- sporove nastale povodom djela za koja se tvrdi da predstavljaju nelojalnu konkurenciju ili monopolistički sporazum;
- privredne prijestupe i
- u postupku stečaja i likvidacije, u skladu sa zakonom, kao i u svim sporovima koji nastanu u toku i povodom provođenja postupka stečaja i likvidacije.

U drugim predmetima:

- da vodi izvršni postupak, ako zakonom nije drugačije određeno;
- da određuje mjere osiguranja, ako zakonom nije drugačije određeno;
- da rješava u posebnim postupcima, ako zakonom nije drugačije određeno;
- da obavlja zemljišno-knjižne poslove u skladu sa zakonom;
- da pruža pravnu pomoć sudovima u Bosni i Hercegovini;
- da vrši poslove međunarodne pravne pomoći, ako zakonom nije određeno da neke od tih poslova vrši kantonalni sud;
- da vrši poslove upisa u registre pravnih lica i
- da vrši druge poslove određene zakonom

b) Mjesna nadležnost

Općinski sud u Zenici prema članu 23 i 23 a. Zakona o sudovima u Federaciji BiH (Sl. novine FBiH broj: 38/05 i 22/06) mjesno je nadležan za:

- krivični,
- građanski,
- vanparnični,
- izvršni i
- prekršajni referat

Općinski sud u Zenici mjesno je nadležan za područje općine Zenica.

U privrednim predmetima, u postupku registracije poslovnih subjekata i političkih stranaka, te u prekršajnim predmetima iz oblasti carina i poreza Sud je mjesno nadležan za područje cijelog Zeničko-Dobojskog kantona.

3. Vremenski period čuvanja ličnih podataka

Vaše lične podatke Sud obrađuje u vremenskom periodu koji je potreban da se ispuni svrha njihove obrade. Nakon prestanka svrhe u koju su prikupljeni, vaši lični podaci više se ne koriste, ali se čuvaju u arhivi onoliko vremena koliko obavezuju zakonski propisi o arhivskoj građi.

4. Tehničke i organizacione mjere zaštite ličnih podataka

Vaše lične podatke Sud obrađuje na način kojim se obezbjeđuje odgovarajuća sigurnost i povjerljivost kao i odgovarajuća primjena principa zakonite obrade ličnih podataka te smanjenje količine ličnih podataka po principu neophodnosti. Preduzete su fizičke, tehničke i organizacione mjere zaštite ličnih podataka, koje su propisane Planom bezbjednosti ličnih podataka. Svi zaposleni u Sudu potpisali su izjave o povjerljivosti ličnih podataka kojima pristupaju.

5. Koja su Vaša prava u vezi sa obradom ličnih podataka?

Vaša prava, uz izuzetke propisane posebnim zakonom, su:

- pravo na pristup svojim ličnim podacima;
- pravo na ispravku ličnih podataka;
- pravo na brisanje ličnih podataka i
- pravo na prigovor.

Za ostvarivanje svojih prava možete se obratiti Sudu pisanim putem ili putem elektronske pošte na naprijed naznačenu adresu. Ako ste nezadovoljni postupkom Suda možete se obratiti nadležnom nadzornom organu Agenciji za zaštitu ličnih podataka www.azlp.ba ili tužbom nadležnom sudu.

6. Prenos ličnih podataka drugim kontrolorima podataka, prenos ličnih podataka u inostranstvo

Vaše lične podatke Sud može dati drugim kontrolorima ukoliko je to potrebno za izvršavanje zakonom propisanih obaveza. Također, vaše podatke Sud neće prenositi drugim kontrolorima u inostranstvu, osim ukoliko takva obrada nije neophodna na osnovu zakona ili međunarodnog ugovora koji ga obavezuje.

Vaše lične podatke Sud daje pružaocima informatičko-komunikacionih usluga sa kojima je zaključio ugovor i koji poštuju pravila postupanja sa ličnim podacima.

7. Korištenje kolačića i objava sadržaja na web stranici

Objavljivanje sudskih odluka/presuda i informativnog sadržaja na web stranici suda vršit će se u skladu sa zakonima F BiH, poštujući princip transparentnosti rada sudova, uzimajući u obzir javni interes, pravo na zaštitu privatnosti i zaštitu ličnih podataka, te zaštitu interesa maloljetnika, svjedoka i oštećenog. Na našoj službenoj internetskoj stranici Općinski sud u Zenici | pravosudje.ba koriste se obavezni, odnosno tehnički kolačići (cookies). Ti kolačići su male datoteke koje omogućavaju ispravan rad internet mjesta i ne možemo ih isključiti, te za njihovo korištenje ne trebamo vašu saglasnost. Obavezni kolačići ne pohranjuju nikakve informacije koje bi vas mogle identifikovati.

8. Promjene Politike privatnosti

Sud će redovno ažurirati Politiku privatnosti kako bi ista sadržavala tačne informacije. O svim izmjenama i dopunama bit ćete blagovremeno informisani u skladu sa principom transparentnosti.